



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

5. Kalenderwoche – ab 31. Januar 2010

Nischdmachn machd faul

Harz viere däde faul machn - had in dor Zeidung geschdandn. Also die meen dadermid, dass währ Harz viere grischn, keene LUSD mähr hamm dud, sisch eene Arbeit zu suchn, weil se mid dähr Arbeit dann ooch nisch mähr Geld hamm dädn, als wie ohne.

Un das däde mir ooch so gehn. Wenn isch fiehr Nischdmachn fasd soviel.. odor noch mähr grischn däde, als wie fiehr Wasmachn, dann dädsch lieber nischd machn.

Wobei - das Nischdmachn... das is off de Dauor beschdimmd ziehmlich langweilich. Villeischn dädsch dann doch lieber was machn wolln? Weeschn dor Abwächslung!

Un außordähm - womeeschlich is das Nischdmachn off Dauor ooch wäsendlich kodschielich, als wie das Wasmachn? Na, wensde was machn dusd, hasde ja keene Zeid, zum Geld ausgähm. Abor wensde nischd machn dusd, da kannsde ja schon frieh anfang mid Geld ausgähm. Un dann dud mor sisch wundorn, wie schnell das Geld allegehn dud. Isch gloobe, so e Harzvier-Monatsgehald hasde ziehmlich schnell dursch de Kähle gejachd. Un wensde dann ooch noch Roochor bisd... - da bisde mid däm Gehald schon ferdich, wenn dor Monad noch lange nisch rum is. Genau, dann is am Ende vom Geld noch sähr viel Monad ibrisch!

Odor wensde bloß dauornd vor dor Rehre hoggn dusd... das had am Ende ooch nischd mähr mid gesundor Lääbensweise zu dun. De Vorfeddung is vorbrogrammierd!

Nee, da dädsch dann villeischn doch lieber was machn gehn, als wie nischd machn un dauornd Monatsieberschisse ham.. un vor dor Rehre hoggn un so!

Geldieborschisse sinn besser! Un die kannstde aber ehm bloß erzielen, wennstde disch dursch was machn vom Geldausgähm ablenkn kannst. Fernsähn hilfd da nischd. Da is de Ablenkung zu schwach. Im Geeschndeel - Schibbs un Bier sinn ja grade beim Fernsähn e fesdor Beschdanddeel jedor Sändung! Nee, das Wasmachn is am Ende besser!

Gud, aber off dor annorn Seide däde isch nadiehrlich ooch vorziehn, wenn isch was machn kennde, wo isch mähr vordien due, als wie wenn isch nischd mache. Das däde misch dann villeischd ooch irschendwie befriedischn. Da dädsch mir dann ehm nidzlich vorkomm!

Nee, dass es Leide gähm dud, die fiehr Nischdmachn mähr Geld grischn dun, als wie eenor fiehr Wasmachn grischn kann, das is nisch rischdisch! Das dud de Faulizidäd fördorn!

Das is ja zum Beischbiel ooch bei dähm Aggormann von dor Deudschn Bank so. Un bei annre Mennedschor! Die dun doch fiehr Nischdmachn soviel Geld grischn, wie die fiehr ährliche Arbeit niemals grischn kenndn! Die missn dähmzufolsche middlorweile schon sowas von schdinkendfaul sein... die sinn middlorweile schon zu faul zum Schdinkn!

Eduard Sachsenmeyer